

# TUTÚ NÍ CADÚHA TÉ PĀBLŪ QUIHI<sup>n</sup> NDAHA ÑÁYIU ÑUÚ ÉFESÚ

*Té Pāblú cādūha-dé tutú quihi<sup>n</sup> ndaha ñáyiú xĩndecu ichi Xítóhó Jesucristú ndécú ñuú Éfesú*

<sup>1</sup> Yúhú té Pāblú ní tendaha ñaha Yá Ndiõxí cāhá<sup>n</sup>-í tnúhu Xítóhó Jesucristú núú ñáyiú, chí duca<sup>n</sup> ní cachí Yá Ndiõxí cunduu, te vitna cādúha-í tutú-a cuendá daquixi-í ndaha nchaa nchòhó ñáyiú cùu cuendá Yá Ndiõxí xĩndecu ñuú Éfesú, te diu-ni nchòhó cúú-ndó ñáyiú sàndáá iní ñáhá xì Xítóhó Jesucristú.

<sup>2</sup> Te xicá<sup>n</sup> táhù-í núú Dütú Ndiõxí Yaá cúú Tātá-ó, ndihi núú Xítóhó Jesucristú sá ná chĩndee chitúu ñaha-gã xii-ndo, te duca<sup>n</sup> ndì nduú-gá ná cādá te ío váha cuu iní-ndó cùndecu-ndo.

*Espíritú Yá Ndiõxí chĩndè ñaha-xi xii-o chi ndècu ndihi-o Xítóhó Jesucristú*

<sup>3</sup> Te cachí-ó sã ío cāhnu cuu Yá Ndiõxí Yaá cúú Tātá Xítóhó Jesucristú, te ndéé andiú quide Yá Ndiõxí nchaa sá vāha sá cúú-xí-ó cuendá sá ndécú ndihi-o Espíritú-gá, te duca<sup>n</sup> quide-gá chí ndècu ndihi-o Xítóhó Jesucristú. <sup>4</sup> Te ndéé cútñahá vátá ngáva-gá ñuyiú nĩ cachí Yá Ndiõxí sá nchóó cùu-o ñáyiú cùu cuendá-gá, te duca<sup>n</sup> nĩ cachí-gá sá cuendá Xítóhó Jesucristú cuendá sá nchóó cùu-o ñáyiú ñá túú tnàhí ná cumání cundecu núú-gã, te duca<sup>n</sup> te vá cùndècu cuéchi-o. <sup>5</sup> Te Yá Ndiõxí ío

cùu iní ñáhá-gă xii-o nũu xíă<sup>n</sup> duca<sup>n</sup> ñĩ cachí-gá ndéé cútnàhá vátá ngăva-gá ñuyíú sã nchóó ndùu-o déhe-gá. Te sá cuendá nchaa sá cádá Xítohó Jesucristú sá cúú-xí-ó, xíă<sup>n</sup> duca<sup>n</sup> ñĩ cachí Yă Ndiöxí, te duca<sup>n</sup> ñĩ cachí-gá chi duca<sup>n</sup> tnàhí ní sani iní-gá cunduu. <sup>6</sup>Te xíă<sup>n</sup> nũu xìni ñũhu-xi sá nchóó càchí-ó sã ìo càhnu cuu Yă Ndiöxí, chi ìo cundahú iní ñáhá-gă chíndèe ñaha-gá xii-o. Te duca<sup>n</sup> quide-gá chi ndècu ndihí-o Xítohó Jesucristú Yaá ìo cùu iní-gá. <sup>7</sup>Te Yă Ndiöxí ìo cùu iní ñáhá-gă xii-o nũu xíă<sup>n</sup> Xítohó Jesucristú ní satì ñĩñí-gă te ní xíhí-gá cuendá dacăcu nihnu ñaha-gă xii-o nũú ùhú núú ndàhú, te duca<sup>n</sup> càda cahnu iní-gá nchaa yíca cuěchi-o. <sup>8</sup>Te Yă Ndiöxí ìo cundahú iní ñáhá-gă chíndèe ñaha-gá xii-o, nàcuáa ngúndecu ndihí-o nchàa sá xíní tnùnì-ó te duca<sup>n</sup> te cuu-o ñăyiu tècú tnùnì. <sup>9</sup>Te Yă Ndiöxí ní dánèhé ñáhá-gă xii-o nchàa sá ndúú yùhu, nchaa sá ñĩ sani iní-gá cada-gá. Te duca<sup>n</sup> ñĩ quide-gá chi duca<sup>n</sup> ñĩ sani iní-gá cunduu. <sup>10</sup>Te sá ñĩ sani iní-gá cada-gá te dacuitíí sã cádá-gă ná sàá nduu, te na sàá nduu-á<sup>n</sup> te mee-gă cada sá Xítohó Jesucristú quindaha-gă nchaa sá ìo andiu, ndihí nchaa sá ìo ñuyíú-a.

<sup>11</sup>Te nchoo ñĩ nduu táhú-ó ñĩ nduu-o ñăyiu cùu cuendá Yă Ndiöxí chi ndècu ndihí-o Xítohó Jesucristú. Te duca<sup>n</sup> ñĩ cuu chi duca<sup>n</sup> tnàhí ní sani iní Yă Ndiöxí cunduu. Te nchaandì túhú sá quídé-gă, quide-gá nàcuáa sàni iní mée-gă cunduu. <sup>12</sup>Te duca<sup>n</sup> ñĩ cuu cuendá sá nchũhú ñăyiu díhna nuu ñĩ sándáá iní tnúhu Xítohó Jesucristú cáhá<sup>n</sup>-ndí sá ìo càhnu cuu mee Yă Ndiöxí cuendá nchaa sá vaha quide-gá. <sup>13</sup>Te nchòhó tucu cútnàhá ní xíndedóho-ndo tnũhu ndáá tnúhu sá càhá<sup>n</sup> nàcuáa

naníhí tǎhú-ó ní cuu ñ<sup>n</sup>nuu-ndo ndìhi Xítóhó Jesucristú chi ní sándáá iní-ndó-gǎ. Te xǎ<sup>n</sup> cútnùní sá nchòhó ní nduu-ndo ñǎyiu cùu cuendá Yǎ Ndiǒxí, chi ní ngúndecu ndìhi-ndo Espíritú-gǎ sá ní cachí-gǎ taxi-gǎ. <sup>14</sup> Te sá ndécú ndìhi-o Espíritú Yǎ Ndiǒxí xǎ<sup>n</sup> cútnùní sá ndàá nduu tǎhú-ó cùndecu-o ndìhi-gǎ ná sàá nduu nàcuaca ñàha-gǎ xii nchaa nchoo ñǎyiu cùu cuendá-gǎ, te sá dúcá<sup>n</sup> càda-gǎ nùu xǎ<sup>n</sup> tǎu-ó càchí-ó sǎ ìo càhnu cuu-gǎ.

*Té Pǎblú xìcá<sup>n</sup> tǎhú-dě núú Yǎ Ndiǒxí cuendá cue ñǎyiu ndècu ichi-gǎ*

<sup>15</sup> Te yúhú ñìhí-í tnúhu sá nchòhó ìo váha sándáá iní-ndó Xítóhó Jesucristú, te nchaa ñǎyiu cùu cuendá Yǎ Ndiǒxí ìo cùu iní-ndó-yu. <sup>16</sup> Te xǎ<sup>n</sup> nùu ñá túú dàña ndeé-í ndàcá<sup>n</sup> tǎhú-í núú-gǎ cuendá-ndó, te ìo xìcá<sup>n</sup> tǎhú-í <sup>17</sup> núú Yǎ Ndiǒxí Yaá cúú Tǎtá Xítóhó Jesucristú cuendá-ndó. Te diu-ni Yǎ Ndiǒxí cúú-gǎ Yaá ìo càhnu cuu. Te xìcá<sup>n</sup> tǎhú-í núú Yǎ Ndiǒxí sá méé-gǎ ná cáda sǎ Espíritú-gǎ chindee ñàha-xi xii-ndo cuendá cuu-ndo ñǎyiu tècú tnùní, te na càda-xi sá cútnùní iní-ndó nàcuáa sàni iní Yǎ Ndiǒxí. <sup>18</sup> Te duca<sup>n</sup> xìcá<sup>n</sup> tǎhú-í núú Yǎ Ndiǒxí cuendá-ndó, cuendá sá nchòhó tecú tnùní-ndó nàcuáa ndùu tnúhu ndee ìní ní taxi-gǎ ní ngúndecu ndìhi-ndo cǔtnàhá ní cáhá<sup>n</sup> ñáhá-gǎ xii-ndo. Te duca<sup>n</sup> cùtnuní tucu iní-ndó sǎ ncháá sǎ ní cachí-gǎ taxi-gǎ nduu tǎhú nchoo cuè ñǎyiu cùu cuendá-gǎ cúú-xí mèe cuií-ni sá ìo-gǎ váha. <sup>19</sup> Te cùtnuní tucu iní-ndó sǎ Yǎ Ndiǒxí ìo càhnu cuu-gǎ quidé-gǎ nchaa núú sǎ vǎha sá cúú-xí nchòo ñǎyiu sándáá iní ñáhá xii-gǎ, chi quide-gǎ sá vǎ yòo tnàhí ndàcu cada sá cúú-xí-ó dàtná ní quide-gǎ <sup>20</sup> ní dándótó-gǎ Xítóhó Jesucristú cùtnàhá ní xíhí-gǎ. Te

ní taxinucóo-gá Xítóhó Jesucrístú xio cùha-gá táxí  
 tnùní-gá. <sup>21</sup> Te Xítóhó Jesucrístú ío-gá cúnúu-gá  
 dàcúúxí nchàa núú cuè espíritú, ndihì dàcúúxí  
 nchàa cue téé yìndaha ñáyiu, ndihì dàcúúxí nchàa  
 dava-gá cue téé cúnúu. Te cuèi vitna te cuèi ndéé  
 núú cuàhá<sup>n</sup> núú vèxi duca<sup>n</sup>-ni ìo cunuu-gã taxi  
 tnùní-gá. <sup>22</sup> Te mee Yã Ndiõxí ní quide-gá sá  
 Xítóhó Jesucrístú taxi tnùní-gá nchaandi túhú sá  
 íó, te ñiu-ni mee Yã Ndiõxí ní cachí-gá sá ncháá  
 ñáyiu cùu cuendá-gá quindaha ñàha Xítóhó Jesu-  
 crístú. <sup>23</sup> Te cada iní-ó sã ncháá ñáyiu cùu cuendá  
 Yã Ndiõxí cúũ-yu yiqui cùñú Xítóhó Jesucrístú,  
 chi ñ<sup>n</sup>-ni cùú-yu ndihì-gá, te mee-gã táxí tnùní-gá  
 nchaandi túhú sá íó.

## 2

*Yá Ndiõxí ío cùndahú iní ñáhá-gã xii-o núu xíã<sup>n</sup> ní  
 dácãcu nihnu ñaha-gã*

<sup>1</sup> Te nchòhó cúú-ndó dàtná ñáyiu ní xíhí cuendá  
 nchaa sá cuèhé sá dúhá quide-ndo ni cuu, dico  
 vitna cada iní-ndó sã dàtná ní ndoto-ndo chi ní  
 nduu táhú-ndó cùndecu-ndo ndihì Yã Ndiõxí ní caa  
 ni quíhí<sup>n</sup>. <sup>2</sup> Te duca<sup>n</sup> ñí xíndecu-ndo ìchi cuehé  
 ichi duha, chi ní cáncicú<sup>n</sup> nihnu-ndo nchàa sá  
 cuèhé sá dúhá íó ñuyíú-a, te ní xóo cada-ndo  
 nchàa nacuáa càhá<sup>n</sup> sácúíhná, te ñiu-ni sácúíhná-ã<sup>n</sup>  
 táxí tnùní-xi nchaa dava-gá espíritú cùndihì-xi, te  
 ñiu-ni-xi ndècu ndihì-xi nchaa ñáyiu ñá túú cùní  
 tníi tnúhu càhá<sup>n</sup> Yã Ndiõxí, te dàcahá<sup>n</sup> ñáhá-xí  
 xii-yu cuendá cundecu-ní-yu ichi cuèhé ichi duha.  
<sup>3</sup> Te nchaa-o dùca<sup>n</sup> ní xóo cada-o dàtná quidé cuè  
 ñáyiu-á<sup>n</sup>, chi ní xóo cada-o nchàa sá cuèhé sá dúhá  
 ñí xóo cani iní-ó, te nándi-gá nchaa sá cuèhé sá

dúhá nǐ xóo cahu iní-ó nǐ xóo cada-o, núu xǎn<sup>n</sup> tàú-ó sǎ dándòho ñaha Yá Ndiǒxí xii-o ni cùu datná tàú-xi dandòho-gá nchaa ñáyiú duca<sup>n</sup> ndècu ichi cuehé ichi duha-án. <sup>4</sup> Te Yá Ndiǒxí ío cùu iní ñáhá-gǎ xii-o núu xǎn<sup>n</sup> ní cundàhú iní ñáhá-gǎ xii-o <sup>5</sup> cuèi cùu-o datná ñáyiú ní xíhí sá cuendá nchaa sá cuèhé sá dúhá quìde-o ni cuu. Te duca<sup>n</sup> nǐ quide-gá ní cundàhú iní ñáhá-gǎ xii-o cuendá cundecu-o ndìhi Xítóhó Jesucristú vitna, te cuu ì<sup>n</sup>nuu-o ndìhi-gá. Te sá cuendá-ni sá cundàhú iní ñáhá Yá Ndiǒxí xii-o xǎn<sup>n</sup> ní quide-gá nàcuáa nchoo nàníhí tàhú-ó. <sup>6</sup> Te cada iní-ó sǎ dàtná ní quide Yá Ndiǒxí cùtnàhá ní dándótó-gǎ Xítóhó Jesucristú cùtnàhá ní xíhí-gá duca<sup>n</sup> nǐ quide ñaha-gǎ xii-o chi ndècu-o ndìhi-gá vitna. Te Xítóhó Jesucristú sa ndècu-gá andiú núú ndécú Yá Ndiǒxí. Te cada iní-ó sǎ Yá Ndiǒxí sa ní quide-gá sá nchóó nǐ ngúndecu túu-o ndìhi Xítóhó Jesucristú, chi ío váha ndècu-o vitna. <sup>7</sup> Te Yá Ndiǒxí quidé vǎha ñaha-gǎ xii-o vitna cuendá sá ná sàà nduu, te diú-ni mee-gǎ cada te cutnùnì iní nchaa ñáyiú sá ìo cùu iní ñáhá-gǎ xii-o, te duca<sup>n</sup> ìo chìndee chitúu ñaha-gǎ xii-o cuendá sá ndécú ndìhi-o Xítóhó Jesucristú. <sup>8</sup> Te Yá Ndiǒxí ío cundàhú iní ñáhá-gǎ xii-ndo núu xǎn<sup>n</sup> ní quide-gá sá nchòhó naníhí tàhú-ndó. Te duca<sup>n</sup> nǐ quide-gá chi ní sándáá iní-ndó-gǎ. Te ñá díú sǎ cuendá ì<sup>n</sup> chiu<sup>n</sup> ni quide-ndo duca<sup>n</sup> ní nàníhí tàhú-ndó, chi mee Yá Ndiǒxí ní cuiní-gá sá dìcò-ni duca<sup>n</sup> nàníhí tàhú-ndó. <sup>9</sup> Te mee Yá Ndiǒxí ní cachí-gá sá ñà díú cuendá ì<sup>n</sup> chiu<sup>n</sup> quide-o naníhí tàhú-ó, te duca<sup>n</sup> nǐ cachí-gá cuendá sá vǎ cádá càhnu-o mee-o. <sup>10</sup> Te Yá Ndiǒxí ní quide ñaha-gǎ xii-o dàtná ì<sup>n</sup> ñáyiú saa

cuèndá sá ñí tnahá tnúhu-o ndìhì Xítóhó Jesucrìstú, te duca<sup>n</sup> ñí quide-gá cuèndá sá cádá-ó mèe-ni sá vǎha. Te Yá Ndiǒxí duca<sup>n</sup> tnahí ní sani iní-gá cunduu sá nchóó cùu-o ñáyiu cada mee-ni sá vǎha.

*Xítóhó Jesucrìstú quidé-gǎ ío váha cùu iní-ó ndècu-o*

<sup>11</sup> Te nchòhó chí dándàcu iní nàcuáa ní xíndecu-ndo ni cùu, chí ñá túú cùu-ndo ñáyiu isràél, te ni ñà túú quide-ndo datná quidé ñáyiu-á<sup>n</sup>, chí ñáyiu-á<sup>n</sup> sǎha-yu señá ñí-yu, te dàquee tíhǔ-yu nchaa ñáyiu ñá túú ndècu señá ñí-xi. <sup>12</sup> Te chí dándàcu iní nàcuáa ní xíndecu-ndo, chí dàvá-á<sup>n</sup> ñà túú ní xíndecu-ndo ndìhì Xítóhó Jesucrìstú, te ni ñà túú ní xǒo cuu tnahá tnúhu-ndo ndìhì ñáyiu isràél, te ni ñà túú ní xíní tñùní-ndó nàcuáa ndùu tnúhu sá ñí cáhá<sup>n</sup> ndáá Yá Ndiǒxí nàcuáa cada váha-gá ñáyiu, te ni ñà túú ní cùu-ndo ñáyiu quíndaha-gǎ, te ni ñà túú ní xǒo níhí-ndó tñùhu ndee ìní sá cùndècu-ndo ndìhì-gá. <sup>13</sup> Te cuèi ní cuu-ndo ñáyiu ñá túú tnahá tnúhu ndìhì Yá Ndiǒxí ní cùu, dico vitna ní tnahá tnúhu-ndo ndìhì-gá chí cùu ì<sup>n</sup>nuu-ndo ndìhì Xítóhó Jesucrìstú, cuèndá sá ñí sati níñí-gǎ te ní xíhí-gá te xǎ<sup>n</sup> duca<sup>n</sup> tnahá tnúhu-ndo ndìhì Yá Ndiǒxí vitna. <sup>14</sup> Te Xítóhó Jesucrìstú ní quide-gá sá nchóó ío váha cuu iní-ó cùndecu-o, te ñu-ni-gá ní quide cuèndá sá vǎ dáquèe tíhú ñáhá ñáyiu isràél xii ñáyiu ñá túú cùu ñáyiu isràél, te duca<sup>n</sup> ì<sup>n</sup>-ná cuú-yu cundecú-yu. <sup>15</sup> Te sá ñí xíhí Xítóhó Jesucrìstú, xǎ<sup>n</sup> ñá túú-gǎ cùnùu nchaa tnúhu sá sánú ìchi ñaha xii ñáyiu nàcuáa cadá-yu cundecú-yu ni cùu. Te duca<sup>n</sup> ñí xíhí Xítóhó Jesucrìstú cuèndá sá cuè ñáyiu isràél ndìhì cue ñáyiu ñá túú cùu ñáyiu isràél

ɛ̃<sup>n</sup>-nǎ cuú-yu cundecú-yu ichi-gá, te duca<sup>n</sup> te vá dáquèe tihú tnáhá-gǎ-yu, te ío váha cundecu ndihì tnáhá-yu. <sup>16</sup> Te duca<sup>n</sup> nǐ quide Xítohó Jesucristú ní xihí-gá núú cùrúxí cuendá sá cue ñáyiú cùu ñáyiú isràél ndihì cue ñáyiú ñá túú cùu ñáyiú isràél vá dáquèe tihú tnáhá-gǎ-yu. Te duca<sup>n</sup> nǐ xihí-gá cuendá ɛ̃<sup>n</sup>-nǎ cuú-yu tnahá tnúhu-yu ndihì Yá Ndiõxí nàcuáa cuu váha iní ñáhá-gǎ xií-yu.

<sup>17</sup> Te cuèi cùu-ndo ñáyiú ñá túú tnàhí xìní ndáá cuendá Yá Ndiõxí ní cùu, dico Xítohó Jesucristú ní quixi-gá ñuyíú-a ní cáhá<sup>n</sup>-gá tnúhu váha nàcuáa ío váha cuu iní-ndó cùndecu-ndo ndihì Yá Ndiõxí. Te ðiu-ni duca<sup>n</sup> nǐ quide-gá sá cúú-xí ncháa ñáyiú sa xìní cuendá Yá Ndiõxí, ðiu-ni ñáyiú isràél. <sup>18</sup> Te cuèi cùu-o ñáyiú isràél àdi ñá túú cùu-o dico ðiu-ni mee Xítohó Jesucristú ní quide-gá sá ncháá-ó tnáhá tnúhu-o ndihì Dútú Ndiõxí Yaá cúú Tǎtá-ó. Te duca<sup>n</sup> nǐ tnahá tnúhu-o ndihì Yá Ndiõxí chi ní ngúndecu ndihì-o Espíritú-gá. <sup>19</sup> Te nchòhó ñáyiú ñá túú cùu ñáyiú isràél ní cuu-ndo ñáyiú ñá túú tnáhá tnúhu ndihì Yá Ndiõxí ní cùu, dico vitna chi ɛ̃<sup>n</sup>-nǎ ní cuu-ndo ndihì nchaa dava-gá ñáyiú cùu cuendá-gá chi cùu-ndo déhe-gá. <sup>20</sup> Te cada iní-ó sǎ cue téé ní táúchíú<sup>n</sup> Xítohó Jesucristú cáhá<sup>n</sup> tnúhu-gá, ndihì cue téé ní xóo cáhá<sup>n</sup> tnúhu Yá Ndiõxí ndéé sanaha cùu-güedé ðàtná cimièntú ɛ̃<sup>n</sup> vehe, te nchòhó cúú-ndó ðàtná ndóho sá sàá vehe-á<sup>n</sup>, te cada tucu iní-ó sǎ Xítohó Jesucristú cúú-gǎ ɛ̃<sup>n</sup> yúú cúnùu cuu cimièntú vehe-á<sup>n</sup>. <sup>21</sup> Te duca<sup>n</sup> ïo váha cùu ɛ̃<sup>n</sup>nuu nchaa ndóho-á<sup>n</sup> ndihì yúú cúnùu-á<sup>n</sup>, te duca<sup>n</sup> tucu ío váha ta quèe tnàha nchaa ndóho-á<sup>n</sup> cuásaá. Te xiǎ<sup>n</sup> cada iní-ó sǎ cúú-xí vèhe Yá Ndiõxí, vehe sá ïo ní cuu íí. Te duca<sup>n</sup> sǎtnahá-xi

cùu nchaa ñáyiu ndècu ichi Xítóhó Jesucrìstú chi ní tnahá tnúhu-yu ndihí-gá, te ì<sup>n</sup> nduu ì<sup>n</sup> nduu ta cùu vii cuu váha-gá-yu núú Yă Ndiöxí cuáhá<sup>n</sup>.  
 22 Te tnahá nchòhó duca<sup>n</sup> sãtnahá-xi cùu-ndo chi ní ngúndecu ndihí-ndo Xítóhó Jesucrìstú, te duca<sup>n</sup> ta cùu vii cuu váha tucu-ndo núú Yă Ndiöxí cuáhá<sup>n</sup>, te cùu-ndo datná vehe Yá Ndiöxí chi ndècu ndihí-ndo Espíritú-gá.

### 3

*Té Păblú yíhí dǐquí-dě cáhá<sup>n</sup>-dé tnúhu Xítóhó Jesucrìstú núú ñáyiu ñá túú cùu ñáyiu isràél*

1 Te yúhú té Păblú yíhí-í vecaá sá cuendá sá càhá<sup>n</sup>-í tnúhu Xítóhó Jesucrìstú núú nchòhó ñáyiu ñá túú cùu ñáyiu isràél, núu xǎ<sup>n</sup> dǐu cuendá-gá duha yíhí-í vecaá vitna. 2 Te nchòhó sa nàha-ndo sá Yă Ndiöxí ní cundàhú iní ñáhá-gă xii-í, te ní cachí-gá sá yúhú quihí dǐquí-í cáhá<sup>n</sup>-í tnúhu Xítóhó Jesucrìstú núú-ndó, te cuendá sá càhá<sup>n</sup>-í tnúhu-gá núú-ndó te cuu-xi sá vǎha sá cúú-xí-ndó. 3 Te yúhú sa ní cachí tnúhu-í xii-ndo lùha ñacuáa ndùu tnúhu ndùu yuhu ní cuu, sá ní cachí tnúhu Yá Ndiöxí xii-í. 4 Te òré dàcuaha-ndo tnúhu ndùu yuhu-á<sup>n</sup> ní cùu te quiní-ndó sǎ yúhú tècú tnùní-í nàcuáa ndùu tnúhu-á<sup>n</sup>, te tnúhu-á<sup>n</sup> càhá<sup>n</sup>-xi cuendá Xítóhó Jesucrìstú. 5 Te tnúhu-á<sup>n</sup> cúú-xí tnúhu sá vǎ yǒ tnahí xìní ní cùu, dico cue tée ní táuchíú<sup>n</sup> Xítóhó Jesucrìstú cáhá<sup>n</sup> tnúhu-gá, ndihí cue tée càhá<sup>n</sup> nàcuáa dàcahu iní ñáhá Yă Ndiöxí ní níhí-güedě tnúhu ndùu yuhu-á<sup>n</sup>, chi Espíritú Yă Ndiöxí ní xáha<sup>n</sup>-xi xì-güedé. 6 Te duha càhá<sup>n</sup> tnúhu ndùu yuhu-á<sup>n</sup> ní cùu: “Cuěi ñáyiu ñá túú cùu ñáyiu isràél te cuěi



ñáyiú cùu ñáyiú isràél dico ì<sup>n</sup>-ni ndùu táhũ-yu sá vǎha núú Yǎ Ndiǒxí, te núu na quíndáá iní-yu tnúhu sá càhá<sup>n</sup> nàcuáa naníhí tàhú-yu, te ì<sup>n</sup>-ná cúũ-yu cundecú-yu, te duca<sup>n</sup> ì<sup>n</sup>-ni cada váha ñaha Yǎ Ndiǒxí xií-yu te núu na cùndecu ndìhí-yu Xítóhó Jesucrístú”, duha ndùu tnúhu ndùu yuhu-á<sup>n</sup> ní cùu.

7 Te Yá Ndiǒxí ní cundàhú iní ñáhá-gǎ xii-í ní taxi-gá chiú<sup>n</sup> quide-í càhá<sup>n</sup>-í tnúhu-gá, te mee-gǎ quidé-gǎ sá yǔhú ndacu-í càhá<sup>n</sup>-í tnúhu-gá. 8 Te nchaa ñáyiú cùu cuendá Yǎ Ndiǒxí cúũ-yu ñáyiú ío-gá cúnùu cadá-yu chiú<sup>n</sup>-gá dàcúxí yǔhú, te cuèi duca<sup>n</sup> dico Yá Ndiǒxí ní cundàhú iní ñáhá-gǎ xii-í ní taxi-gá chiú<sup>n</sup> quide-í càhá<sup>n</sup>-í tnúhu-gá núú cuè ñáyiú ñá túú cùu ñáyiú isràél. Te tnúhu-gá-á<sup>n</sup> càhá<sup>n</sup>-xi sá sũní ïo váha cada ñaha Xítóhó Jesucrístú xii-o. 9 Te duca<sup>n</sup> ñí cachí Yǎ Ndiǒxí sá càhá<sup>n</sup>-í tnúhu-gá cuendá danèhé-í nchaa ñáyiú. Te sá dánèhé-í-yu-á<sup>n</sup> cúú-xí tnũhu ndùu yuhu sá ñí sani iní-gá ndéé sanaha nàcuáa cada váha-gá cue ñáyiú. Te ndéé dàvá-á<sup>n</sup> ñí quesaha ndùu yuhu tnúhu-á<sup>n</sup> ní cùu. Te ðiu-ni-gá cúú-gǎ Yaá ní cadúha nchaandi túhú sá ïó. 10 Te duca<sup>n</sup> ndùu yuhu tnúhu-á<sup>n</sup> ní cùu cuendá sá ncháá espíritú cúnùu ndecu andiú quini-xi vitna nàcuáa quide nchaa ñáyiú ní tuha ñaha xii Yá Ndiǒxí cuendá duca<sup>n</sup> cùtnuní iní-xi sá ïo váha cùtnuní iní-gá nàcuáa cada-gá. 11 Te Yá Ndiǒxí ní sani iní-gá ndéé sanaha nàcuáa ní cuini-gá cada Xítóhó Jesucrístú, te ní sáá nduu ñí quide Xítóhó Jesucrístú nàcuáa ní cuini Yǎ Ndiǒxí cada-gá. 12 Te vitna cùyii-o càhá<sup>n</sup> ndìhi-o Yǎ Ndiǒxí cuendá sá ndécú ndìhi-o Xítóhó Jesucrístú, te sàndáá iní-ó-gǎ. 13 Te núu xiǎ<sup>n</sup> càhá<sup>n</sup>-í dóho-ndo

să cuëi duha ndòho-í vitna dico vá ná tũhú iní-ndó cànchicú<sup>n</sup> nihnu-ndo ìchi Xítóhó Jesucristú. Te sá dúhá ndòho-í te cùu-xi sá vãha sá cúu-xi-ndó, chi cuu-ndo ñãyiu cùu cahnu núú Yã Ndiõxí.

*Xítóhó Jesucristú ío cùu iní ñãhá-gã xii-o*

<sup>14</sup> Te sá cuëndá nchaa sá ñĩ sani iní Dútú Ndiõxí quidé-gã xiã<sup>n</sup> yúhú nguĩñĩ xítĩ-í núú-gã càhá<sup>n</sup> ndĩhi-í-gá, te ðiu-ni-gá cúú Yáá cúú Tátá Xítóhó Jesucristú. <sup>15</sup> Te mee Yã Ndiõxí ní cachí-gá sá ncháá espíritú ndécú àndũu cunduu-xi datná ní cachí méé-gã cunduu-xi. Te ní cachí tucu-gá sá nchóó cùu-o ñãyiu, te cunduu-o dàtná cuiní méé-gã cunduu-o. <sup>16</sup> Te xicá<sup>n</sup> táhù-í núú Dũtú Ndiõxí sá Espíritú-gá ná cádá nãcuáa cuita níhĩ ndéé-gã-ndó quĩhĩ<sup>n</sup> cundecu-ndo ìchi-gá, te duca<sup>n</sup> xicá<sup>n</sup> táhù-í núú-gã cada Espíritú-gá chi ío cãhnu cuu-gá. <sup>17</sup> Te xicá<sup>n</sup> táhú tucu-í núú Yã Ndiõxí sá Xítóhó Jesucristú ná cundecu ndĩhi ñaha-ni-gá xii-ndo chi sãndáá iní-ndó-gã, te duca<sup>n</sup> te vá dáñã ndéé-ndó ío cuu iní tnáhá-ndó. <sup>18</sup> Te xicá<sup>n</sup> táhú tucu-í núú Yã Ndiõxí cuëndá-ndó ndĩhi cuendá dava-gá ñãyiu cùu cuendá-gá, cuëndá sá cútnùní iní-ndó sã sũúni cùu iní ñãhá Xítóhó Jesucristú xii-o. <sup>19</sup> Te duha xicá<sup>n</sup> táhù-í núú Yã Ndiõxí chi cuiní-í sá ncháá-ndó tècú tnùní-ndó sã ío cùu iní ñãhá Xítóhó Jesucristú xii-o cuëi vá ndácú cãva-o quini-ó nãcuáa cùu iní ñãhá-gã xii-o. Te xicá<sup>n</sup> táhú tucu-í núú Yã Ndiõxí sá ío na cundecu ndĩhi ñaha-gá xii-ndo, te duca<sup>n</sup> cànchicú<sup>n</sup> nihnu-ndo càda-ndo nchaa nacuáa quide mee-gá.

<sup>20</sup> Te Yá Ndiõxí ío-gá vãi sá ndácú-gã táxi-gã dàcúúxí sã xicá<sup>n</sup>-ó nõú-gã, te cuëi ndéé nchaa sá ñã túú sãni iní-ó ñhĩ-ó te tàxi-gá, te duca<sup>n</sup> chi mee-gã

ndécú ndìhi ñaha-gá xii-o, te ndàcu-gá quidé-gă nándi sá vâha sá cúú-xí-ó. <sup>21</sup> Te vitna nchaa nchoo ñăyiu ndècu ichi Xítóhó Jesucrìstú chí ná càchí-ó sã ïo càhnu cuu Yá Ndiǒxí, te duca<sup>n</sup>-ni cãhá<sup>n</sup>-ó sã ïo càhnu cuu-gá ni caa ni quíhí<sup>n</sup> chi ndècu ndìhi-o Xítóhó Jesucrìstú. Te duca<sup>n</sup> na cùnduu.

## 4

### *Espíritú Yă Ndiǒxí quidé-xí cùu ì<sup>n</sup>nuu-o ndecu-o*

<sup>1</sup> Te yúhú té Păblú yíhí-í vecaá sá cuëndá Xítóhó Jesucrìstú, te cãhá<sup>n</sup> ndàhú-í núú-ndó sã cádá vâha-ndo cùndecu-ndo datná tàú-xi cada cue ñăyiu ní cãhá<sup>n</sup> Yă Ndiǒxí cundecu ndìhi-gá. Te nchòhó tnàhá-ndó cùu-ndo ñăyiu ní cãhá<sup>n</sup> ñáhá Yă Ndiǒxí cundecu ndìhi-gá. <sup>2</sup> Te vá cádá càhnu-ndo mee-ndo, cunduu váha iní-ndó, cunduu càhnu iní-ndó, te cuu iní tnáhá-ndó năcuáa duca<sup>n</sup> cùndee iní-ndó nūu ná cúú sã cúmăní nūú tnáhá-ndó. <sup>3</sup> Te ïo nducu ndêe-ndo cuu ì<sup>n</sup>nuu-ndo cundecu-ndo, chi Espíritú Yă Ndiǒxí chindee ñàha-xi xii-ndo, te duca<sup>n</sup> ïo váha cuu iní-ndó cùndecu-ndo chi cùu ì<sup>n</sup>nuu-ndo. <sup>4</sup> Te nchoo ñăyiu ndècu ichi Xítóhó Jesucrìstú ì<sup>n</sup>-ni cùu-o, te duca<sup>n</sup> ì<sup>n</sup>-ni Espíritú Yă Ndiǒxí ndécú, te ðiu-ni duca<sup>n</sup> ì<sup>n</sup>-ni tnúhu ndee iní ní ngúndecu ndìhi-o cùtnàhá ní cãhá<sup>n</sup> ñáhá Yă Ndiǒxí xii-o. <sup>5</sup> Te ì<sup>n</sup>-ni Xítóhó Jesucrìstú ndécú tàxi tnuní ñáhá-gă xii-o, te ì<sup>n</sup>-ni cùu-o sandáá iní-ó tnúhu-gá, te ì<sup>n</sup>-ni ñă sandute-o. <sup>6</sup> Te ì<sup>n</sup>-ni Dütú Ndiǒxí cúú Yàá cúú Tătá-ó nchàa-o, te ðiu-gá cúnūu-gá yíndàha ñaha-gá xii-o nchàa-o. Te Yá Ndiǒxí dácàhá<sup>n</sup>-gá iní-ó quide-o chiu<sup>n</sup>-gá, te duca<sup>n</sup> ndècu ndìhi ñaha-gá xii-o nchàa-o.

7 Te nchoo ndì díí<sup>n</sup> ndì díí<sup>n</sup> chìndee ñaha Yá Ndiöxí xii-o quède-o nacuáa ndùu chiu<sup>n</sup> ní cachí Xítóhó Jesucristú cada-o. 8 Te quèè ndáá-xi nàcuáa càhá<sup>n</sup>-xi núú tütú Yá Ndiöxí núú càchí-xi:

Xítóhó Jesucristú cuándaa-gá andiu te ío cùnuu-gá, chi nchaa cue espíritú cúú ùhú iní ñáhá xii-gá ñá túú ní ndàcu-xi naá ndihí ñaha-xi xii-gá, te mee-gá ní cachí-gá nàcuáa ndùu chiu<sup>n</sup> nduu táhú ì<sup>n</sup> ì<sup>n</sup> ñáyiú cadá-yu.

Duha càchí-xi núú tütú-gá.

9 Te sá dúcá<sup>n</sup> càhá<sup>n</sup>-xi sá cuándaa-gá andiu xiá<sup>n</sup> cútnùní iní-ó sá ñí cuu<sup>n</sup>-gá ñuyíú-a. 10 Te Xítóhó Jesucristú ní cuu<sup>n</sup>-gá ñuyíú-a, te diu-ni-gá cuándaa-gá andiu cuendá ío cunuu-gá taxi tnùní-gá nchaandi túhú sá ío. 11 Te ní dácãhñu-gá cue téé xinu cuechi núú-gá ì<sup>n</sup> ì<sup>n</sup> núú chiu<sup>n</sup> cada-güedé. Te ní cachí-gá sá dáva-güedé càhá<sup>n</sup>-güedé tnúhu-gá, te dava-güedé ní cachí-gá sá càhá<sup>n</sup>-güedé nàcuáa dàcahu iní ñáhá Yá Ndiöxí xii-güedé. Te dava-güedé ní cachí-gá sá cúú-güedé cue téé datècú tnúhu cue ñáyiú nàcuáa cadá-yu naníhí tàhú-yu. Te dava-güedé ní cachí-gá sá cúú-güedé cue téé quindaha ñaha xii ñáyiú dacuàha ñaha-güedé xií-yu tnúhu-gá. 12 Te duca<sup>n</sup> ñí cachí-gá cada cue téé-á<sup>n</sup> cuendá canu ichi-güedé cue ñáyiú cùu cuendá Yá Ndiöxí cuendá duca<sup>n</sup> ñáyiú-á<sup>n</sup> ñihí-yu nàcuáa cadá-yu chiu<sup>n</sup>-gá, te duca<sup>n</sup> cuíta níhí ndéé-gá-yu cundecú-yu ichi Xítóhó Jesucristú. 13 Te duca<sup>n</sup> ñí cachí Xítóhó Jesucristú cunduu ndéé sáá nduu cùu ì<sup>n</sup>nuu-o quindáá iní-ó tnúhu-gá, te duca<sup>n</sup> cùu ì<sup>n</sup>nuu-o tecú tnùní-ó nàcuáa ndùu cuendá-gá chi diu-gá cúú-gá Déhe Yá Ndiöxí, te cuu-o ñáyiú ío quède ndáá dàtná quidé mèe Xítóhó Jesucristú. Te duca<sup>n</sup> te ñá túú tnàhí-gá ná cùmání-ó

núú Yă Ndiöxí. <sup>14</sup> Te duca<sup>n</sup> te vá cúú-gă-ó dàtná cue landú vátá cútnùní váha-gá iní-xí, te ni vă cádá-gă-ó dàtná quidé ndùte lamár, chi ndute-á<sup>n</sup> òré quéné tächí te cuáhá<sup>n</sup>-xi duha cuáhá<sup>n</sup>-xi dàcá<sup>n</sup>, te duca<sup>n</sup> chi vá quìndáá-gá iní-ó tnùhu càhá<sup>n</sup> nchaa ñáyiú dándahú ñáhá xì-o, chi ñáyiú-á<sup>n</sup> ïo váha xító-yu nàcuáa dándahú ñáhă-yu xii-o chi càchí-yu sá càhá<sup>n</sup>-yu tnúhu Yá Ndiöxí dico ñá ndàá. <sup>15</sup> Te nchoo ïo cuu iní tnáhá-ó, te vá dándahú tnáhá-ó, chi càhá<sup>n</sup>-ó mèe-ni sá ndàá. Te xìni ñuhu-xi sá ì<sup>n</sup> nduu ì<sup>n</sup> nduu cuita cada ndáá-gá-ó quìhí<sup>n</sup> dàtná quidé ndáá méé-gă, te ðiu-ni-gá cúú-gă Yaá cúnùu cuu díhna tàxi tnuní ñáhá-gă xii-o. <sup>16</sup> Te ðiu-ni Xítohó Jesucrìstú quidé ñàha-gá xii nchaa nchoo ñáyiú ndècu ichi-gá dàtná yìquì cùñú méé-gă, chi ì<sup>n</sup> yìquì cùñú ïo váha ní quée tnàha ì<sup>n</sup> ì<sup>n</sup> xichi, te duca<sup>n</sup> yìhì túchi yìquì cùñú-ă<sup>n</sup> yótnì-xi nchaa nacuáa ní quée tnàha. Te duca<sup>n</sup> sàtnahá-xi cùu nchoo chi ì<sup>n</sup>-ni cùu-o ndecu-o ichi Xítohó Jesucrìstú táxi tnùnì ñáhá-gă xii-o. Te núu nchoo quide-o nchaa nacuáa tàú-xi cunduu te cùu iní tnáhá-ó, te duca<sup>n</sup> ta nìhì ndéé-gă-ó cuáhá<sup>n</sup> ndécú-ó ìchi-gá.

*Vá cádá-gă-ó dàtná ní xóo cada-o cùtnàhá ní xìndecu-o ìchi cuehé ichi duha*

<sup>17</sup> Te vitna yúhú càhá<sup>n</sup>-í dóho-ndo quide-í núú Xítohó Jesucrìstú sá vă cùndècu-gá-ndó dàtná xìndecu ñáyiú ñá túú sàndáá iní ñáhá xì Yá Ndiöxí, chi nchaa ñáyiú-á<sup>n</sup> ñà túú vèdana nàndìhì nchaa sá sání iní-yu. <sup>18</sup> Te ni ñà túú vèdana cùtnunì iní-yu nàcuáa ndùu tnúhu ndáá tnúhu Yá Ndiöxí. Te ñáyiú-á<sup>n</sup> ñà túú ndùu táhŭ-yu cundecú-yu nàcuáa cuinì Yă Ndiöxí, chi ñá túú vèdana tècú

tnùnì-yu te duca<sup>n</sup> chi ío sàá iní-yu. <sup>19</sup> Te ñá túú tnàhí-gá ná sání iní-yu ndècú-yu ichi cuèhé ichi duha, te ío cùdíí iní-yu ndècú-yu ichi díí iní, te ñá díú-ní xǎ<sup>n</sup> chi nándi-gá nchaa sá cuèhé sá dúhá quidé-yu ndècú-yu. <sup>20</sup> Dico tnúhu Xítóhó Jesucristú sá ñí sándáá iní-ndó chi ñá túú dùca<sup>n</sup> sanu ichi ñaha-xi xii-ndo cada-ndo. <sup>21</sup> Te nchòhó ní cutnùnì iní-ndó nàcuáa ndùu cuendá Xítóhó Jesucristú, te dàcuaha-ndo tnúhu ndáá ñi-ni tnúhu-gá nàcuáa ndècu-ndo ichi-gá. <sup>22</sup> Te vitna vá cání-gǎ iní-ndó càda-ndo datná ní xóo cada-ndo cǔtnàhá ní xíndecu-ndo ìchi cuehé ichi duha, chi núu nchaa-ni sá cuèhé sá dúhá-ǎ<sup>n</sup> ná cùhu<sup>n</sup>-ni iní-ndó càda-ndo, te uu<sup>n</sup>-gá uu<sup>n</sup>-gá cuita dacuíta nihnu ñaha-xi xii-ndo quíhí<sup>n</sup>, chi núu nchaa-ni sá cuèhé sá dúhá-ǎ<sup>n</sup> ná cùhu<sup>n</sup>-ni iní-ndó te dàticá nuu ñaha-xi xii-ndo. <sup>23</sup> Te nchòhó, xìni ñuhu-xi sá vǎ dúcá<sup>n</sup>-gǎ caní iní-ndó càda-ndo te tàú-ndó ndùu-ndo datná ñ<sup>n</sup> ñáyiú ní cacu túu saa. <sup>24</sup> Te nduu iní-ndó dàtná cuìní méé Yǎ Ndiǒxí cunduu, chi nduu-xi nàcuáa càa iní méé-gǎ, te duca<sup>n</sup> te cuu-ndo ñǎyiú ío váha cada ndáá, te cuu ndisa-ndo ñǎyiú ñá túú tnàhí ná cumání cundecu núú-gǎ.

<sup>25</sup> Te cuendá xǎ<sup>n</sup> núu càhá<sup>n</sup>-í dóho-ndo sǎ nchòhó vá dàcuàndehnde-gá-ndó dàtná ní xóo cada-ndo, te mee-nǎ sá ndáá cáhá<sup>n</sup> ndihí tnàha-ndo, chi ñ<sup>n</sup>-ni cùu-o ndecu-o ichi Xítóhó Jesucristú.

<sup>26</sup> Te núu cùdéé<sup>n</sup>-ndó te cada cuendá-ndó sǎ vǎ cadá-ndó ñ<sup>n</sup> cuéchi sá dúcá<sup>n</sup> cùdéé<sup>n</sup>-ndó, te vá dúcá<sup>n</sup>-ní cùhu<sup>n</sup> iní-ndó tnúhu sàtú iní-á<sup>n</sup>. <sup>27</sup> Te vá dáñá-ndó mèe-ndo dandahú ñáhá sàcuíhná xii-ndo.

<sup>28</sup> Te núu dava-ndo cùu-ndo ñadúhú te vá dúcá<sup>n</sup>-gǎ cada-ndo, chi nducu-nǎ-ndó ñ<sup>n</sup>

chiu<sup>n</sup> váha cada-ndo nàcuáa duca<sup>n</sup> ñhí-ndó sǎ chindèe-ndo cue ñáyiú ndàhú ñáyiú ñá túú ñá ndécú ndìhi.

<sup>29</sup> Te vá càhá<sup>n</sup>-gá-ndó ñi ñ<sup>n</sup> tnúhu cuèhé, chi mee-ñá tnúhu vii tnúhu váha càhá<sup>n</sup>-ndó nàcuáa duca<sup>n</sup> ngũnu ichi cue ñáyiú ndèdóho ñaha xii-ndo, te núu duca<sup>n</sup> na càda-ndo te cuu-xi sá vǎha sá cúu-xí ñáyiú duca<sup>n</sup> ndèdóho ñaha xii-ndo-á<sup>n</sup>.

<sup>30</sup> Te vá cáda-gǎ-ndó ñi ñ<sup>n</sup> sá ñá túú tàú-ndó càda-ndo cuendá sá vǎ dándìhú-ndó ñi Espiritú Yǎ Ndiǒxí, chi ñi Espiritú-gá ndécú ndìhi-ndo, te xǎá<sup>n</sup> cútnùní ñi-ndó sǎ sàá nduu nàcuaca ñaha-gá xii-ndo cùndecu-ndo ndìhi-gá ñi caa ñi quíhí<sup>n</sup>.

<sup>31</sup> Te vá dásàtú-gá-ndó ñi tnàha ñáyiú-ndo, te ñi vǎ cúhú<sup>n</sup> ñi-ndó tnúhu sàtú ñi, te ñi vǎ cúdèé<sup>n</sup>-gǎ-ndó, te cuèi núú chítú núú tàcá vǎ càhá<sup>n</sup> cana-ndo cǔcuèhé-ndó tnàha ñáyiú-ndo, te ñi vǎ cuátnùhu-ndo tnàha ñáyiú-ndo, te ñi vǎ cáni cuèhé cani duha ñi-ndó cuendá tnàha ñáyiú-ndo.

<sup>32</sup> Te cundàhú ñi tnáhá-ndó, te cada tnàha-ndo sá vǎha, te cada càhnu ñi tnáhá-ndó núu ná cúú sǎ cúmǎní núú tnáhá-ndó dàtná ñi quide Yǎ Ndiǒxí ñi quide càhnu ñi-gá nchaa yíca cuèchi-ndo sǎ cuendá Xítóhó Jesucrístú.

## 5

*Nàcuáa tàú-xi cundecu nchaa ñáyiú cùu déhe Yǎ Ndiǒxí*

<sup>1</sup> Te nchòhó cúú-ndó ñáyiú ío cùu ñi ñáhá Yǎ Ndiǒxí, te ñi déhe-gá cúú-ndó núu xǎá<sup>n</sup> xíní ñùhu-xi canchicú<sup>n</sup> ñi-ndo càda-ndo datná quidé mèe-gá. <sup>2</sup> Te ío cuu ñi tnáhá-ndó cùndecu-ndo datná cúú ñi ñáhá Xítóhó Jesucrístú

xii-ndo, chi ñiu-gá ní cachí-gá sá cùú-gá cuendá nchaa cuéchi-o te ní xihí-gá, te sá dúcá<sup>n</sup> ñí xihí-gá te ní cuu-gá ðàtná ñ<sup>n</sup> táhú sá cùú-xí Yă Ndiöxí, te ío váha ní cuu iní Yă Ndiöxí sá dúcá<sup>n</sup> ñí quide-gá.

<sup>3</sup> Te sá cuendá sá nchòhó cùú-ndó ñăyiu cùu cuendá Yă Ndiöxí ñúu xiá<sup>n</sup> nchaa nchòhó cue téé vá càhá<sup>n</sup> ndihí-ndo ñăyiu ðihí te núu ñá díú ñàðihí-ndó cùú-yu, te duca<sup>n</sup>-ni nchàa nchòhó cue ñăyiu ðihí tucu vá càhá<sup>n</sup> ndihí-ndo cuè téé te núu ñá díú yì-ndo cuu-güedé, te ni vǎ cání tnàhí iní-ndó cùndecu-ndo ichi ðíí iní, te ni vǎ xihó-ndó ñí ñ<sup>n</sup> sá ndécú ndihí tnaha ñăyiu-ndo, te ni ñ<sup>n</sup> nchaa xiá<sup>n</sup> vá cání iní-ndó càda-ndo, te ni vǎ cǎcú nèhe-ndo. <sup>4</sup> Te ni vǎ càhá<sup>n</sup>-ndó ñ<sup>n</sup> tnúhu sá ni vǎ cùú cùndedóho ñăyiu, te ni vǎ càhá<sup>n</sup>-ndó ñ<sup>n</sup> tnúhu cùtexínu, te ni ðàva-gá nchaa tnúhu sá ñà túú vǎdana nàndíhi vá càhá<sup>n</sup>-ndó, chi nchaa tnúhu-á<sup>n</sup> ñà túú tàú-xi cáhá<sup>n</sup>-ndó, te xini ñuhu-xi sá váha-gá sá ndàcá<sup>n</sup> táhú-ndó ñúú Yă Ndiöxí cuendá nchaa sá váha quide-gá. <sup>5</sup> Te nchòhó sa xini ndáá-ndó sá ncháá cuè téé càhá<sup>n</sup> ndihí ñăyiu ðihí te ñá díú ñàðihí-güedé cùú-yu, ndihí cue ñăyiu ðihí càhá<sup>n</sup> ndihí cue téé te ñá díú yì-yu cùu-güedé, nchaa ñăyiu-á<sup>n</sup> vǎ ndúú tǎhǔ-yu cundecú-yu núú ndécú Yă Ndiöxí ndihí Xítóhó Jesucristú táxí tnùnigá. Te ni cuè ñăyiu xindecu ichi ðíí iní, te ni cuè ñăyiu xìho nchaa sá ndécú ndihí tnaha ñăyiu-xi vá ndúú tǎhǔ-yu cundecú-yu ndihí-gá núú ndécú-gǎ táxí tnùnigá. Te tnúhu sá càchí-ó xìho-o nchaa sá ndécú ndihí tnaha ñăyiu-o, ñ<sup>n</sup>-ni cùu-xi ndihí tnúhu sá càchí ñăyiu quide cahnú-yu nchaa sá càchí-yu cùu ndióxí te ñá



ndàá sá ndiõxí cúú-xí. <sup>6</sup> Te vá quìndáá iní-ndó ñí ñnúhu sá ñà túú nàndíhi càhá<sup>n</sup> ñáyiu, chi ñáyiu-á<sup>n</sup> ïo dandòho ñaha Yá Ndiõxí xií-yu cuèndá nchaa sá cuèhé sá dúhá quidé-yu chi ñá túú sàndáá iní ñáhã-yu xii-gá. <sup>7</sup> Núu xiã<sup>n</sup> càhá<sup>n</sup>-í dóho-ndo sã vã ñihí tnáhá-ndó ndíhi cue ñáyiu-á<sup>n</sup>.

<sup>8</sup> Te nchòhó ní cuu-ndo dàtná cue ñáyiu ní xíndecu núú néé chi ní xíndecu-ndo ìchi cuehé ichi duha, dico vitna ní ngúndecu-ndo ìchi Xítohó Jesucristú, te ñá túú-gã ndécú-ndó núú néé dàtná ní xíndecu-ndo ñí cùu. Te vitna cada-ndo nchàa nacuaá tàú-xi cunduu chi ndècu-ndo ichi-gá. <sup>9</sup> Te sá cuèndá sá ndécú-ndó ìchi-gá núu xiã<sup>n</sup> cúú-ndó ñáyiu váha, te quide ndáá-ndó ndècu-ndo, te ñá túú dàcuandehnde-ndo chi càhá<sup>n</sup>-ndó mèe-ni sá ndáá. <sup>10</sup> Te ío váha cada cuèndá-ndó nchàa sá cúú vãha iní Xítohó Jesucristú, te xiã<sup>n</sup> cada-ndo. <sup>11</sup> Te vá cãncíicú<sup>n</sup> nihnu-ndo tnáhá-ndó càda-ndo datná quidé cuè ñáyiu ndècu ichi cuehé ichi duha, chi nchòhó tàú-ndó cãhá<sup>n</sup>-ndó dôho nchaa ñáyiu duca<sup>n</sup> ndècu ichi cuehé ichi duha-á<sup>n</sup> cuèndá nchaa sá quidè-yu. <sup>12</sup> Te cucaha<sup>n</sup> núú-ndó vã càhá<sup>n</sup>-ndó cuèndá ñí ñnú sá cuèhé sá dúhá quide dayuhu nchaa ñáyiu-á<sup>n</sup>. <sup>13</sup> Dico òré dándixi túú tnúhu Yá Ndiõxí iní-yu nàcuáa quidè-yu te cùtnuní iní-yu sá ñá túú quide váha-yu, te duca<sup>n</sup> ndíxi cuéchi iní-yu cuèndá nchaa sá cuèhé sá dúhá quidè-yu. <sup>14</sup> Te núú tütú Yá Ndiõxí càchí-xi:

Nchòhó cúú-ndó dàtná ñáyiu xìdí, te vitna ndiquíú ñí-ndó,  
te cùu tucu-ndo datná ñáyiu ní xíhí, te vitna ndoto-ndo,

te Xítohó Jesucristú chindee ñàha-gá xii-ndo  
nàcuáa vá cùndècu-gá-ndó ìchi cuehé ichi  
duha.

Duha càhá<sup>n</sup>-xi núú tütú-gá.

<sup>15</sup> Te ío váha cada cuèndá-ndó nàcuáa cada-ndo  
cùndècu-ndo, te vá cáda-ndó dàtná xíquide cue  
ñáyiú ñá túú tècú tnùnì, chi cada-ndo dàtná xíquide  
ñáyiú ío váha sàá díquí-xi. <sup>16</sup> Te ì<sup>n</sup> nduu ì<sup>n</sup>  
nduu cani iní-ndó càda-ndo nchaa nacúaa tàú-xi  
cunduu, chi vitna ío cùnuu nchaa sá cuèhé sá  
dúhá. <sup>17</sup> Te cuu-ndo ñáyiú tècú tnùnì cuèndá  
duca<sup>n</sup> cùtnunì iní-ndó nàcuáa cuìnì Yá Ndiöxí  
cada-ndo, te vá cáda-ndó dàtná xíquide cue ñáyiú  
ñá túú tnáhi cùtnunì iní-xi nàcuáa cuìnì Yá Ndiöxí  
cadá-yu. <sup>18</sup> Te vá cúú-ndó ñáyiú quihu chi núú  
duca<sup>n</sup> na càda-ndo te dàcuíta nihnu-ndo mèe-ndo,  
te dañà-ndo mèe-ndo sá Espíritú Yá Ndiöxí ná tàxi  
tnunì ñáhá-xí xii-ndo. <sup>19</sup> Te cáhá<sup>n</sup>-ndó nàcuáa-ni  
cuáhá<sup>n</sup> ndudú sá ñí xóo cata nchaa cue ñáyiú ndéé  
sanaha ñí xóo chiñuhú-yu Yá Ndiöxí. Te cáhá<sup>n</sup>-ndó  
nàcuáa cuáhá<sup>n</sup> ndudú sá chíñuhu-ndo Yá Ndiöxí,  
te cata-ndo. Te cuèi nchaa dava-gá ndudú diu-ni  
duca<sup>n</sup> cãhá<sup>n</sup>-ndó te cata-ndo. Te ñí yùhu ñí iní-ndó  
càta-ndo nchaa ndudú-á<sup>n</sup> chiñuhu-ndo Yá Ndiöxí.  
<sup>20</sup> Te vá dãná ndéé-ndó ndàcá<sup>n</sup> táhú-ndó núú  
Tátá-ó Dütú Ndiöxí cuèi ndècu váha-ndo àdi ñá  
túú ndècu váha-ndo. Te duca<sup>n</sup> càda-ndo chi ndècu  
ndìhi-ndo Xítohó Jesucristú.

*Tàú-xi sá quèndáa iní tnáhá cue ñáyiú ndècu ichi  
Xítohó Jesucristú*

<sup>21</sup> Te nchòhó ñáyiú ndècu ichi Xítohó Jesucristú  
tàú-xi sá quèndáa iní tnáhá-ndó, te duca<sup>n</sup> càda-ndo  
chi nèhe-ndo sá yíñuhu núú Yá Ndiöxí.

22 Te nchaa nchòhó ñáyiú òhí ndécú yí-xi, xini ñuhu-xi sá quíndáá iní-ndó yí-ndo datná sàndáá iní-ndó Xítohó Jesucristú. 23 Chi yí-ndo tàxi tnuní ñáhá-güedě xii-ndo dàtná quidé Xítohó Jesucristú táxi tnùní ñáhá-gă xii nchoo cuè ñáyiú ndècu ichi-gá. Te òu-gá cúú-gă Yaá ní dácăcu nihnu ñaha xii-o núú ùhú núú ndàhú, te cùu-o datná yiqui cùñú-gá. 24 Te dàtná quidé nchòo ñáyiú ndècu ichi Xítohó Jesucristú sàndáá iní-ó tñi-o nchaa tnúhu càhá<sup>n</sup>-gá, duca<sup>n</sup> tàú-xi cada nchaa nchòhó ñáyiú òhí quíndáá iní-ndó tñi-ndo nchaa tnúhu càhá<sup>n</sup> yí-ndo.

25 Te tnàhá nchaa nchòhó cue téé tucu tàú-xi sá ío cuu iní-ndó ñàðíhí-ndó dàtná quidé Xítohó Jesucristú cúú iní ñáhá-gă xii nchaa nchoo ñăyiú ndècu ichi-gá, chi mee-gă ní xíhí-gá sá cuendá-ó să cúú iní ñáhá-gă xii-o. 26 Te duca<sup>n</sup> ñí quide-gá cuendá sá ncháá ñăyiú vitna ngúndecu ichi-gá cuu yíñùhú-yu núú Yă Ndiõxí, te duca<sup>n</sup> ndàda ndoo ndada nine-gá iní-yu sá cuendá sá quíndáá iní-yu tnúhu Yă Ndiõxí, te cuanduté-yu. 27 Te duca<sup>n</sup> ñí quide-gá cuendá sá ncháá ñăyiú na ngúndecu ichi-gá ío váha cundecú-yu núú-gă, te duca<sup>n</sup> vă cundècu-gá ni ì<sup>n</sup> cuéchi-yu núú-gă, te ni ì<sup>n</sup>-gá sá ñà túú-gă ná cumání-yu núú-gă chi ío cundecu yíñùhú-yu. 28 Te sá dúcá<sup>n</sup> quide Xítohó Jesucristú sá cúú-xí cuè ñáyiú ndècu ichi-gá, xí<sup>n</sup> tàú-xi sá nchòhó cue téé xíndecu ñàðíhí-xi cuu iní-ndó ñàðíhí-ndó, te coto-ndõ-yu dàtná xító-ndó yiqui cùnú méé-ndó, te cada iní-ndó să ncháá cuè téé ío cùu iní ñàðíhí-xi cùu iní-güedé méé-güedé chi

ì<sup>n</sup>-nǎ cú<sup>u</sup>-yu. <sup>29</sup> Te nchoo sà naha-o sá nì ì<sup>n</sup> ñáyiu ñá túú dàquee tíhǔ-yu yíqui cùñú-yu, chi da uu<sup>n</sup>-gá chíndèé-yu te xító-yu. Te diu-ni duca<sup>n</sup> quide Xítóhó Jesucristú ndihí nchaa ñáyiu ndècu ichi-gá, <sup>30</sup> chi cùu-o datná yíqui cùñú méé-gǎ, te duca<sup>n</sup> chi ì<sup>n</sup>-ni cùu-o ndihí-gá. <sup>31</sup> Te tnúhu Yá Ndiöxí cächí-xi: “Sá cuëndá xǎ<sup>n</sup> nǔu nchaa cue téé na nihí ñadihí-xi te di<sup>n</sup>-ná cada-güedé tǎtá-güedé ndihí nǎná-güedé, te ñadihí-nǎ-güedé cuu cuu ndihí-güedé, te duca<sup>n</sup> ì<sup>n</sup>-ná cuu-güedé ndihí-yu”, duha cächí-xi. <sup>32</sup> Te tnúhu-a cùu-xi ì<sup>n</sup> tnúhu cǎhnu vihi, te duca<sup>n</sup> sǎ tnàhá-xi cùu Xítóhó Jesucristú ndihí cue ñáyiu ndècu ichi-gá. <sup>33</sup> Te cǎhá<sup>n</sup>-ni tucu-í dóho nchaa nchòhó cue téé xǐndecu ñadihí-xi sá ïo cuu iní-ndó ñadihí-ndó te coto-ndó-yu dàtná xító-ndó mèe-ndo, te duca<sup>n</sup>-ni nchàa nchohó ñáyiu dihí tucu canehe-ndo sǎ yíñùhu núú yi-ndo.

## 6

<sup>1</sup> Te nchaa nchòhó cue landú, quíndáá iní-ndó tǎtá-ndó ndihí náná-ndó chi duca<sup>n</sup> cuení Yá Ndiöxí cunduu, te diu duca<sup>n</sup> tnàhí tàú-xi cada-ndo. <sup>2</sup> Te Yá Ndiöxí ní cachí-gá sá cǎnèhe-ndo sá yíñùhu núú tǎtá-ndó ndihí núú nǎná-ndó. Te tnúhu-án cúú-xí tnúhu cùnuu ní cǎhá<sup>n</sup>-gá cada cue ñáyiu cuëndá cada váha ñaha-gǎ xíi-yu. <sup>3</sup> Te ní cachí-gá sá nǔu duca<sup>n</sup> na cǎda-ndo te ío váha cundecu-ndo, te duca<sup>n</sup> ïo naha cùdí-ndo cùndecu-ndo ñuyíú-a.

<sup>4</sup> Te nchaa nchòhó cue téé cùu tǎtá, vá dásátú-ndó iní cue déhe-ndo chi canu ichi-ndo-güèxi nacuáa tàú-xi cunduu, te

dacuàha-ndo-güexi nchaa tnúhu váha nàcuáa cuìní Yă Ndiöxí cunduu.

<sup>5</sup> Te nchaa nchòhó cue ñáyiú xìnu cuechi, quindáá iní-ndó cuè ñáyiú dii chù<sup>n</sup>-xi quide-ndo, te canehe-ndo sã yíñùhu núŷ-yu, te ío váha cuu iní-ndó càda-ndo chiú<sup>n</sup>-yu, te duca<sup>n</sup> nì yuhu nì iní-ndó càda-ndo. Te cada iní-ndó sã dàtná tnúhu sá chíú<sup>n</sup> Xìtohó Jesucristú quidé-ndó. <sup>6</sup> Te dava ñáyiú xìnu cuechi, mee-ni òré ndéhé ñáyiú dii chù<sup>n</sup>-xi quidé-yu ío ndùcu ndeé-yu quide chiu<sup>n</sup> váha-yu cuendá cuìní-yu cudíú-yu. Dico nchòhó vá dúcá<sup>n</sup> càda-ndo, chí cuèi ndècu ñáyiú dii chù<sup>n</sup>-xi quide-ndo àdi ñá túŷ-yu dico cada chiu<sup>n</sup> váha-ni-ndo, te cada iní-ndó sã dàtná tnúhu sá chíú<sup>n</sup> Xìtohó Jesucristú quidé-ndó, te cada-ndo nì yuhu nì iní-ndó nàcuáa cuìní Yă Ndiöxí cunduu.

<sup>7</sup> Te ío váha cuu iní-ndó càda-ndo chiu<sup>n</sup>-án, chí cada iní-ndó sã dàtná tnúhu sá chíú<sup>n</sup> Xìtohó Jesucristú quidé-ndó te ñá díú chù<sup>n</sup> cue ñáyiú ñuyíú-a. <sup>8</sup> Te nchòhó sa cùnuni iní-ndó sã nàcuáa ndùu chiu<sup>n</sup> váha ní quide-ndo ì<sup>n</sup> ì<sup>n</sup>-ndo, te duca<sup>n</sup> cunduu sá táxí Xìtohó Jesucristú nduu táhú-ndó cuèi cùu-ndo ñáyiú dàñá queé núú chíú<sup>n</sup> pàtróó<sup>n</sup>-xi àdi cuu-ndo ñáyiú ñá túú tnàhí dàñá quee núú chíú<sup>n</sup> pàtróó<sup>n</sup>-xi.

<sup>9</sup> Te nchaa nchòhó ñáyiú xíndecu ndìhi ñáyiú xìnu cuechi, tnàhá-ndó tàú-ndó càda váha-ndo sã cúú-xí cuè ñáyiú xìnu cuechi núú-ndó, te vá cùndùu nínu iní-ndó núŷ-yu, te chí cuàha cuendá sá díú-ní Xìtohó Jesucristú Yaá ndécú àndu taxi tnuní ñáhá-gă xii-ndo ndìhí-yu, te sá cúú-xí mèe-gá chí ì<sup>n</sup>-ni cùu-ndo núú-gă, te ì<sup>n</sup>-ni càda ñaha-gă xii-ndo.

*Yá Ndiöxí chíndè-gá cue ñáyiú ndècu ichi-gá*

*cuendá sá vǎ ndácú sàcuíhná nàá ndihí ñaha-xi xii-yu*

10 Te vitna nchaa nchòhó ñáyiú ndècu ndihí-í ichi Xítohó Jesucrístú càchí tnúhu-í xii-ndo sǎ ïo nducú-ndo nàcuáa cada-ndo ñhí ndéé-ndó cùu ñnuu-ndo ndihí Xítohó Jesucrístú, chi mee-gǎ ïo càhnu cuu-gǎ, te chindee ñaha-gǎ xii-ndo. 11 Te ñu-ni nchaa sá ñi nduu táhú-ndó núú Yǎ Ndiòxí ñu-ni nchaa xiǎ<sup>n</sup> cuhu<sup>n</sup> iní-ndó, chi xiǎ<sup>n</sup> chindee ñaha-xi xii-ndo ñhí ndéé-ndó cùndecu-ndo cuendá sá vǎ dándàhú ñáhá sàcuíhná xii-ndo. 12 Chi nchoo ñà díú cuè ñáyiú ñuyíú-a nàá ndihí-o, chi ndihí cue espíritú cùndihí yucu ñávǎha, te ñu-ni nchaa espíritú-á<sup>n</sup> cùnùu-xi cuéi núú ñnu quide-xi nchaa sá cuèhé sá dúhá, te ñu-ni-xi cùnùu-xi ñuyíú-a sànu ichi-xi cue ñáyiú quidé-yu nchaa sá cuèhé sá dúhá. 13 Te ïo cuhu<sup>n</sup> iní-ndó nchaa sá ñi nduu táhú-ndó núú Yǎ Ndiòxí cuendá duca<sup>n</sup> ñhí ndéé-ndó cùndecu-ndo, te vǎ ndácú yùcu ñávǎha ná cada ñaha-xi xii-ndo oré cuíni-xi coto ndeé ñáhá-xí. Te sátá ná dàquee tíhú-ndó yùcu ñávǎha te ñhí-ni cunduu-ndo cùndecu-ndo ichi Yǎ Ndiòxí. 14 Te duca<sup>n</sup> cùndecu-ni-ndo ichi Yǎ Ndiòxí cada-ndo dàtná xíquide cue sandàdú, chi cue téé-á<sup>n</sup> ïo ñhí xíndáa-güedé. Te cáhá<sup>n</sup>-ndó mèe-ni tnúhu ndáá tnúhu Yǎ Ndiòxí, te cuu-ndo dàtná cue sandàdú cue téé ndàda tii xití-xi òré quíhí<sup>n</sup>-güedé nàá-güedé. Te duca<sup>n</sup> sǎtnahá-xi cuu-ndo te núu na càhá<sup>n</sup>-ndó mèe-ni tnúhu ndáá tnúhu Yǎ Ndiòxí. Te cada ndáá-ndó cùndecu-ndo ichi-gǎ, te cuu-ndo dàtná cue sandàdú cue téé xíxíhnu sá yídǎhu ñaha xii-güedé òré nàá-güedé cuendá sá vǎ ñicùèhé-güedé. Te duca<sup>n</sup> sǎtnahá-xi cuu-ndo te núu na càda ndáá-ndó cùndecu-ndo

ichi-gá. <sup>15</sup> Te cundecu túha-ndo cǎhá<sup>n</sup>-ndó tnǎhu Xítóhó Jesucristú, tnúhu sá cǎhá<sup>n</sup> nàcuáa cuu váha iní ñáyi cuundecú-yu, te cuu-ndo dàtná cue sandàdú cue téé ndíhu zapàtú-xi quíhí<sup>n</sup>-güedé nàá-güedé. Te duca<sup>n</sup> sǎtnahá-xi cuu-ndo te núu na cùndecu túha-ndo cǎhá<sup>n</sup>-ndó tnǎhu Xítóhó Jesucristú núu ñáyi. <sup>16</sup> Te cǎchí tnúhu tucu-í xii-ndo sǎ ïo quindáa iní-ndó Yǎ Ndiǒxí cuendá sá vǎ ndácú sàcuíhná nǎ cada ñaha-xi xii-ndo, te duca<sup>n</sup> te cuu-ndo dàtná cue sandàdú cue téé xínehe vítú chínèe-güedé sáquídáhu ñaha-xi xii-güedé cuendá sá vǎ cuicú<sup>n</sup>-güedé sá nchicú<sup>n</sup> ñuhú téé ñaha cue téé nàá ndihi-güedé. Te duca<sup>n</sup> sǎtnahá-xi cuu-ndo te núu na quindáa iní-ndó Yǎ Ndiǒxí. <sup>17</sup> Te ïo cuhu<sup>n</sup> iní-ndó sǎ ñí naníhí tǎhú-ndó, te cuu-ndo dàtná cue sandàdú cue téé ñuhú mbelú cáxí<sup>n</sup>. Te duca<sup>n</sup> sǎtnahá-xi cuu-ndo te núu na cùhu<sup>n</sup> iní-ndó sǎ ñí naníhí tǎhú-ndó. Te ïo cuhu<sup>n</sup> iní-ndó tnǎhu Yǎ Ndiǒxí, chí tnúhu-á<sup>n</sup> ñí taxi Espiritú-gá ndécú ndihi-ndo chindee ñaha-xi xii-ndo, te cuu-ndo dàtná cue sandàdú cue téé xínehe machítí cuáhá<sup>n</sup>-güedé nàá-güedé. Te duca<sup>n</sup> sǎtnahá-xi cuu-ndo te núu na cùhu<sup>n</sup> iní-ndó tnǎhu Yǎ Ndiǒxí. <sup>18</sup> Te vǎ dáñá ndéé-ndó cǎhá<sup>n</sup> ndihi-ndo Yǎ Ndiǒxí nàcuáa chindee ñaha Espiritú-gá xii-ndo, te cácá<sup>n</sup> tǎhú-ndó núú-gǎ núu ná cuiní-ndó, te ïo cundecu túha-ndo cǎhá<sup>n</sup> ndihi-ndo-gǎ, te vǎ nátùhú iní-ndó cǎcá<sup>n</sup> tǎhú-ndó núú-gǎ cuendá nchaa dava-gá cue ñáyi cùu cuendá-gá. <sup>19</sup> Te tnàhá cuendá-í cácá<sup>n</sup> tǎhú-ndó núú Yǎ Ndiǒxí cuendá sá ná chindee ñaha-gá xii-í níhi-í tnúhu cǎhá<sup>n</sup>-í órè cǎhá<sup>n</sup>-í tnúhu-gá, te duca<sup>n</sup> vǎ yùhú-í cǎhá<sup>n</sup>-í nàcuáa ndùu tnúhu sá cǎhá<sup>n</sup> nàcuáa naníhí tǎhú-ó núú ñáyi tnúhu sá vǎtá cùndèdóho-gá-yu.

<sup>20</sup> Te Yá Ndiöxí ní cachí-gá sá yǔhú cuu-í ìí<sup>n</sup> té cada-í núu-gă cáhá<sup>n</sup>-í tnúhu-gá núu ñăyiu, te ðiu cuendá tnúhu-á<sup>n</sup> yíhì-í vecaá vitna. Te ío cáca<sup>n</sup> táhú-ndó núu Yă Ndiöxí cuendá-í cuendá sá yǔhú cuyi-í ñi yùhu ñi iní-í cáhá<sup>n</sup>-í tnúhu-gá núu ñăyiu nàcuáa tàú-xi cunduu.

*Tnúhu ndéé núu ñi ndihí-ná*

<sup>21</sup> Te té Tìquicú téé ío cùu iní-í ndécú ndihí-o ichi Xítóhó Jesucrístú cúú-dě ìí<sup>n</sup> téé ío váha quide ndáá xínú cuèchi-dé núu Xítóhó Jesucrístú, téé-á<sup>n</sup> cachí tnúhu-dé xii-ndo nàcuáa cùu ndecu-í ndihí nchaa nàcuáa quide-í cuendá duca<sup>n</sup> cùtnuní iní-ndó. <sup>22</sup> Te cuendá xǎ<sup>n</sup> núu cuìní-í tendaha-í-dé quixi-dé núu ndécú-ndó cuendá cachí tnúhu-dé xii-ndo nchaa nacuáa cùu ndecu-ndí iha, te duca<sup>n</sup> tàxi-gá-dé tnúhu ndee ìní cundecu ndihí-ndo.

<sup>23</sup> Te xìcá<sup>n</sup> táhù-í núu Tătá-ó Dǔtú Ndiöxí ndihí núu Xítóhó Jesucrístú sá ncháá nchòhó ñăyiu ndècu ndihí-í ichi-gá sá ðiu-gá ná cádá te ío váha cuu iní-ndó cùndecu-ndo, te duca<sup>n</sup> ìo cuu iní tnáhá-ndó, te ío quindáá iní-ndó-gă. <sup>24</sup> Te nchòhó ío cùu iní-ndó Xítóhó Jesucrístú, te ñá túú dàña ndéé-ndó cùu iní-ndó-gă. Te mee Yă Ndiöxí ío na chindee chitúu ñaha-gă xii-ndo. Te duca<sup>n</sup> na cùnduu. Te ío chí cádá ndèe iní-nă vitna.



**Tnúhu ní cáhá<sup>n</sup> yă ndiöxí xito cùu uú**  
**New Testament in Mixtec, Peñoles (MX:mil:Mixtec,**  
**Peñoles)**

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

**Copyright Information**

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Peñoles

**© 2002, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 3 Mar 2023 from source files  
dated 29 Jan 2022

872f7754-0986-5ecd-a059-925a708a6939